

Furlan a scuele: a son viertis lis adesions

I gjenitôrs a puedin zovâsi di cheste oportunitât educative dai 13 di Zenâr ai 14 di Fevrâr, cu la iscrizion al cicli scolastic

Al è rivât il moment di iscrivi i fruts a scuele e ancje di fâ sieltis educativis che a promovin il lôr percors di cressite, come la pussibilitât di une didattiche plurilengâl, une oportunitât che tantis fameis dal Friûl a presein aromai di timp. Dai 13 di Zenâr ai 14 di Fevrâr dal 2026, tal moment de iscrizion ae scuele de infanzie, primarie e secondarie di prin grât, i gjenitôrs a podaran zovâsi dal insegnament dal furlan pai lôr fîs par dute la durade dal cicli scolastic. E je une siele che ancje l'an passât e à fat il 78% des fameis, segn che e je une grande cussience dai vantaçs cognitîfs, sociâi e culturâi peâts a une educazion plurilengâl, aspîet che la ricercje sientifiche e a za dimostrât a larc. I fruts e lis frutis che a studiin il furlan a imparin cun plui facilitât l'inglês e chês altris lenghis, e a disvilupin abilitâts logjichis matematichis e creativis plui altis.

L'insegnament dal furlan al è di almancul 30 oris di studi par an e nol gjave oris a chês altris materiis. La leç, di fat, e stabilis che si fasi tal 20% dal curriculum che lis scuclis a fassin in maniere autonome. Par zovâsi di chest insegnament, si à di indicâ la siele tal moment de iscrizion online sul portâl dal MiM – Ministeri de Istruzion e dal Merit, unica.istruzione.gov.it, tal câs de scuele primarie e di chês secondarie di prin grât, o suntun modul di cjarte tal câs de scuele de infanzie. Cun di plui, lis segretariis dai istitûts a son simpri a disposizion par judâ e furnî sclariments.

Par supuartâ la ativitât didattiche in classe, di cualchi an al è ancje "Anîn!", il manuâl che al compagne i arlêfs de scuele primarie a scuvierzi la lenghe e la culture furlane. Un invistiment pal avignî de lenghe, promovût de ARLeF – Agenzie regionâl pe lenghe furlane e de Regjon Autonome Friûl-Vignesie Julie tal meti in vore il Plan gjenerâl di politiche linguistiche pe lenghe furlane. Il manuâl al è dât fûr sore nuie a ducj i students che a sielzin di imparâ il furlan a scuele: il volum pes classis 1^e e 2^e al è stât realizât cun chês di svicinâsi in maniere graduâl ae lenghe; chel pe 3^e, 4^e e 5^e, invece, al va insot te storie e te gjeografie furlanis, te lenghe e te leterature. Dut intune dimension plurilengâl, cu la presince dal inglês e di chês altris lenghis che si fevelin tal teritori regionâl.

A cui che si domande ancjemò parcè che l'insegnament dal furlan a scuele al sedi une oportunitât, si pues rispuindii che nus al dîs la sience. I studis, di fat, a mostrin che i fruts

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

bilengâi a imparin cun plui facilitât altris lenghis, come l'inglês; a disvilupin une capacitât di aprendiment plui grande e une comprehension plui svelte; a àn abilitâts logjichis matematichis e creativis plui altis. Cun di plui, si adatin miôr ai cambiaments, di là di vê une propension plui marcade tal vierzisi bande chei altris. Infin, no si à di dismenteâ i vantaçs pe salût dal cerviel: cul doprâ plui lenghis si lu manten zovin e agjil, intardant i pericui di demence e Alzheimer. Une risorse cognitive preziose, che al è ben coltivâ fin di cuant che si tache a lâ a scuele.

Udin, ai 9 di Zenâr dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<